

إِنَّ الدِّينَ عِنْدَ اللَّهِ الْإِسْلَامُ



لَا إِلَهَ إِلَّا اللَّهُ مُحَمَّدٌ رَّسُولُ اللَّهِ

Khutba Jummah

HADHRAT MUHYI-UD-DIN AL-KHALIFATULLAH

Munir Ahmad Azim

09 Novembre 2018

01 Rabi'ul Awwal 1440 AH

Après ki li fine salué tous so bane disciples (et tous bane Musulmans) entier le monde avec le *Salaam* - la Salutation de paix dans l'Islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lor : « *Nous ene Nannié Ditout Sans Allah* ».

Chers frères et sœurs de la foi islamique, mo bane chers disciples, ni zot, ni moi nous pas doit nous l'existence à nous propre volonté. Sa l'univers vaste là et tous bane différents créatures ki li contenir zot le chef-œuvre d'ene sel et Unique Créateur, avec ene ensemble de bane règles, de bane la lois pour sak espèce et création. Sa Créateur Unique là c'est Allah.

Au début, à part le Créateur, pas ti ena aucaine créature. Ensuite Allah (swt) fine décidé pou créer bane êtres vivants, couma bane anges, bane jinns et bane humains (bane dimounes/ la race humaine). Parmi sa bane créatures là, plus spécifiquement, bane jinns et bane dimounes, ena bane ki servi zot la vie pour faire le bien, tandis ki bane les autres servi zot la vie pour faire le mal. Allah dire :

« **Par le jour kan li éclairer ! Et par séki Li fine crée, mâle et femelle ! Ou faire zefforts dans bane buts différents.** » (Al-Layl 92 : 3-5).

Ainsi, li clair ki l'homme et la femme bizin rempli zot bane jours et zot bane la nuits par bane zefforts différents pour zot survie lors la terre et donc zot bizin faire face bane conséquences de zot bane actions le Jour du Jugement.

« Quant à celui ki so balance léger, so destination pou dans ene fossé profond. Ki pou montrer toi séki li été sa ? C'est ene difé ardent. » (Al-Qariah 101 : 9-12).

L'homme et la femme, en somme la race humaine bizin rempli so devoir envers so Créateur, et le devoir principal c'est l'adoration exclusif d'Allah (swt) et pou faire tous bane zefforts possible pour construire zot la vies lors base de l'Islam – soumission complet à Allah – et pou servi Li en toute sincérité et piété.

Allah dire : **« Mo fine crée jinns et dimounes pou adore Moi. »** (Az-Zariyat 51: 57)

Et kan li servi Allah, dimoune bizin aussi servi l'humanité parski l'essence d'Allah trouve dans sakaine de bane êtres humains lors la terre.

Allah dire : **« Mo pou créer ene dimoune avec la terre cuite ki sonner, fabriqué avec la boue. Kan Mo fine arrange li bien et Mo fine soufflé Mo l'esprit en li... »** (Al-Hijr 15 : 29-30).

De ce fait, en servant l'humanité, nous rapproche nous d'Allah. En vérité, nous, bane êtres humains nous infiniment faibles, et nous ena grand besoin de l'appui d'Allah. Nous fine être crée faibles. Nous pas ena contrôle lor le déroulement de l'univers, lors la révolution de la terre autour du soleil, nous pas ena contrôle lors climat et ni lors nous l'état de santé et ainsi ki lors bonheur et bane malheurs ki gouverne nous la vie. Allah (swt) dire :

« Ô dimounes, ou bizin l'aide Allah tandis ki Li pas bizin personne et Li mérite nous louanges. » (Al-Fatir 35 :16).

Dans ene Hadith-e-Qudsi, Allah dire : **« Ô Mo bane serviteurs, zot tous dans l'égarement, sauf bane ki Mo guider; alors demande ki zot être guidés et Mo pou guide zot. »** (Muslim, Ibn Majah, Tirmidhi).

Certainement, faibles couma nous été, nous bizin la toute puissance et le support d'Allah afin ki nous capave survivre lors la terre, et pour reste dans le droit chemin afin pou rassure nous survie éternel dans ene lé monde ki pou bien pli sublime (extra bon) pour nous, si seulement nous comporte nous d'ene meilleure façon lors la terre. C'est vrai ki pour le moment la vie future li invisible pour nous et nous sens et nous l'esprit pas capave entièrement comprend sa bien, mais nous la foi, nous l'âme demande nous pou croire dans so l'existence, parski sa la foi là, sa l'âme là li rattaché avec l'Éternel, nous Bondié, et c'est bien Li ki nous Guide Éternel et c'est Li Qui, pour rassure nous survie physique, morale et spirituel envoie dans sa monde là de temps à autre, So bane prêcheurs (élu de Dieu), bane Messagers pour renforci la foi de bane dimounes dans le Dieu Unique, et aussi pour consolide le lien entre zot et Bondié, en insistant ki Bondié li l'Ultime destination de tous dimounes et ki c'est Li Qui riche, fort et puissant et ki c'est dimounes ki faibles, et pauvres et ki sans l'aide et la bénédiction divine, zot pas pou arrive à nannié dans sa le monde ici-bas là.

Rappelle zot, zot tous, ainsi ki moi-même ensam, nous bizin rappelle ki nous ti ene nannié ditout, kot nous pas ti même ena kit l'existence, et ki c'est Allah ki fine crée nous. Li fine crée nous l'âmes et puis Li fine envoie nous lors la terre dans bane les corps d'argiles/ humains afin ki nous conne sa le monde là et ki nous lutter, nous faire zéffort pour nous survie et ki nous adore Li et remercier Li pour tous sa bane faveurs là.

Certainement, la Sagesse divine li en vérité énorme. Nous pas capave conne de A à Z (entièrement) la sagesse derrière tous bane décisions et sagesse d'Allah. Allah fine donne nous tout ! Li fine donne nous ene lécorps humain afin ki nous capave vivre lors sa la terre là et Li fine accorde nous tous bane facultés, telles ki la raison et la force physique afin ki nous capave vivre pleinement nous la vie couma bane êtres intelligents ki conne réfléchi afin ki nous cherche Li et retrouve Li dans nous et tout autour de nous. Quoi ki nous faibles, Li fine renforci nous et fine donne nous les moyens pour réussir dans nous quête, dans nous but.

Allah explique nous nous pauvreté (et faiblesse) et aussi So sagesse :

« Dire: 'Pense impé. Si Allah enlève ou pouvoir pou tender et guetter, et si Li mette ene scellé lor ou lécoeur, ki bondié à part Allah capave faire ou régagne tout sa ?' » (Al-Anam 6 :47).

« Dire zot: ‘Guettez. Si Allah ti faire la nuitte pou ou continuellement ziska le Jour du Jugement, ki bondié à part Allah capave ramène la lumière pou ou ?’ » (Al-Qasas 28 :72).

Personne pas pou capave donne nous quoique ce soit sans permission d’Allah. Li honore saki Li envie, Li humilié saki Li envie. Si Li rasse nous la vue et nous pouvoir tender, que ce soit pouvoir guetter et tender physique et spirituel – tous les deux, personne pas pou capave guéri nous et guide nous excepté Allah. Bondié Li infiniment gentil. Li ordonne nous pou adore Li et kan nous pou faire sa, nous pou rapproche nous avec Li ; et Li aussi Li pou rapproche Li avec nous. C’est Li ki protège nous contre bane différents handicaps. Li Miséricordieux, et Li le Bienfaiteur par excellence. Celui ki oulé senti li fort et glorieux bizin humilier li devant Allah. C’est dans sa humiliation là ki li pou trouver ki li pou être élever aux ciels ; c’est-à-dire, li pou trouver couma Allah pou élève so statut et li pou récolter l’amour divine. Le vrai succès, ki li physique (de sa lé monde là) et spirituel (de l’autre lémonde) trouve dans la soumission à nous Créateur (Allah).

Zot bizin courber et humilier zot devant Li (Allah) et la porte de So miséricorde pou ouvert pou zot. Bane milles merveilles de sa le monde ici-bas là et de l’au-delà pou révéler à zot. Zot bizin combattre bane satans de sa lé monde là afin pou reste dans le droit chemin, et à sak fois ki Li pou envoye zot So messenger, zot bizin suivre li et obéir li afin ki zot vine parmi bane bienheureux dans sa lé monde présent là et dans l’autre la vie aussi. Zot faiblesse humaine pou alors compenser par zot la force spirituel parski si Allah avec zot, tout avec zot, mais si Allah pas avec zot, nannié pas avec zot. Zot pou perdi dans l’abîme du désespoir.

Ki Allah accorde zot So pitié et ouvert pour zot le chemin de So plaisir. *Ameen*. Combler zot bane faiblesses par zot bane la forces spirituels. Nourri zot bane l’âmes avec l’obéissance à Allah et à So Messenger et accompli zot bane devoirs lors la terre avec bane grand zefforts, soins et sagesse, et avec la crainte révérencielle d’Allah. Reste fidèles à Allah et zot pou trouve Allah à zot côtés tout au long de zot l’existence lors la terre. *Insha-Allah, Ameen*.